




ՎԵՀԱՓԱՌ ՀԱՅՐԱՊԵՏԻ ՔԱՐՈՉԸ ՄԱՅՐ ՏԱՃԱՐՈՒՄ
ԿԱԹՈՒՂԻԿԵ ՍՈՒՐԲ ԷԶՄԻԱՇՆԻ ՏՈՆԻՆ
(13 հունիսի 1993 թ.)

«Յանուն Հօր և Որդույ և Հոգույն Սրբոյ. ամէն»

«Էջ Միածինն ի Հօրէ և լոյս փառաց ընդ նմա».

Սիրելի հավատացյալներ,

Այսօրվա շաբաթականը երգում է հրաշքը Փրկչի՝ մեր Հիսուսի Քրիստոսի իջման Արարատյան դաշտ ու նրա հետ փառքը լույսի: Այս փառաբանական երգը նվիրված է մեր այս Ս. Տաճարին, որտեղ գտնվում ենք այս պահին և աղոթում ենք միասին: Մեր ժողովրդի պատմության մեծագույն իրադարձությունը, հոգևոր իմաստով, հանդիսացավ 301 թվականին հայ ժողովրդի քրիստոնեացումը, հայ ժողովրդի մկրտությունը և Հայաստանի հռչակումը իբրև ազգային պետական կրոնը: Պատմությունը հայտնի է մեզ բոլորիս, որ մինչև 301 թ. հայերը թեև ապրում էին իբրև ժողովուրդ և ունեին սեփական պետություն, բայց չունեին սեփական ազգային կրոնը: Նրանք պաշտում էին չաստվածներ, որոնք փոխառություններ էին դրացի պետություններից՝ թե՛ Պարսկաստանից և թե՛ հեթանոսական Հունա-Հռոմեական պետությունից: Քրիստոսի ծնունդից ու հարությունից հետո, 300 տարիներ շարունակ սուրբ առաքյալները Հիսուսի Ավետարանի լույսը տարածել էին աշխարհի բոլոր ծագերում, մասնավորապես Հռոմեական կայսրության տարածքի վրա: Նաև Հայաստան թափանցել էր այդ լույսը Ս. Թադեոս և Ս. Բարդուղիմեոս առաքյալների միջոցով: Թեև քրիստոնեությունը հալածվում էր ամեն տեղ, նաև Հայաստանում, սակայն ի վերջո Հայաստանում հաղթանակեց քրիստոնեական կրոնը և 301 թվականին, ինչպես ասացի, մեր ժողովուրդն ընդունեց ճշմարիտ նոր կրոնը, Տրդատ Գ. թագավորի օրոք և Ս. Գրիգոր Լուսավորչի ջանքերով: Այսպիսով Հայաստանը դարձավ աշխարհի առաջին քրիստոնյա պետությունը, և երկու տարի հետո կառուցվեց այս տաճարը, համաձայն Գրիգոր Լուսավորչի մի տեսիլքի: Մի գիշեր, աղոթքի պահին, Սուրբ Գրիգորը մի տեսիլք ունեցավ, թե Հիսուս Լույսի կերպարանքով իջավ երկնքից և ոսկյա Մուրճը ձեռքին ցույց տվեց, որտեղ պետք է կառուցվի առաջին հայկական քրիստոնեական տաճարը, այսինքն այս տա-

ճարը: Ահա թե ինչու այս տաճարը կոչվում է Էջմիածնի տաճար, որովհետև Միածինը, այսինքն Հիսուս Քրիստոս այստեղ իջավ լուսեղեն կերպարանքի ներքո և ցույց տվեց կառուցվելիք տաճարի վայրը: Այսպիսով ահա, 303 թվականին, ուղիղ 1690 տարիներ առաջ, կառուցվեց այս տաճարը, Գրիգոր Լուսավորիչ իր Ս. Աշով օծումը կատարեց, առաջին պատարագը մատուցեց բազմահազար ժողովրդի ներկայության, ուխտավորներ, որոնք եկել էին պատմական Հայաստանի բոլոր շրջաններից: Ահա այս եղելությունը, այս իրադարձությունը մեծագույն հրաշքն է հանդիսանում մեր բազմադարյան պատմության ընթացքում:

Բայց շարականագիրն ասում է, որ ոչ միայն Հիսուս իջավ այստեղ, այլ նաև լույսի փառքը: Այս խոսքը վերաբերում է ոչ թե նյութական արևի լույսին, այլ հոգևոր լույսին: Եվ իրոք, քրիստոնյա դառնալով հայ ժողովուրդը վերածնունդ ապրեց հոգեպես, դարձավ նոր ժողովուրդ, Ս. Գրքի ժողովուրդ, Ավետարանի ժողովուրդ, Քրիստոսի Ավետարանի լույսով նա կերպարանափոխեց իր ողջ էությունը, իր հոգևոր աշխարհը, դարձավ ստեղծագործ ազգություն, դարձավ ոչ միայն քրիստոնեական հավատքին փառած ժողովուրդ, այլ նաև քրիստոնեությունը ստեղծագործորեն ապրող ժողովուրդ:

Եվ իրոք, հագիվ հարյուր տարի անց քրիստոնեությունն ընդունելուց, հայ ժողովուրդն ապրեց իր մշակութային կյանքի ոսկե դարը՝ Ե դարը մեր պանծալի: Վերջնականապես գեղեցկորեն ձևավորվեց մեր մայրենի լեզուն, ստեղծվեցին հայ տառերը Ս. Մեսրոպի ձեռքով, թարգմանվեց ամբողջ Ս. Գիրքը թարգմանիչների ձեռամբ, Սուրբ Էջմիածնում առաջնորդությամբ ներքո Ս. Մեսրոպի և Ս. Սահակ Հայրապետի: Եվ ավելին, Նույն Ե դարում, ու հետագայում, կազմավորվեց մեր ազգային ինքնությունը պետությունը հայկական՝ սկիզբ առավ ու զարգացավ մեր ճարտարապետությունը, մանրանկարչությունը, հայ երաժշտությունը և բոլոր հայկական արվեստները: Ավելին, կազմավորվեց հայ ժողովրդի բարոյական նկարագիրը ու հայրենասիրական ոգին: Ահա այս բոլորը միասին հանդիսանում են իմացական հոգևոր-ազգային ծաղկումի մի դարաշրջան, որ մենք կոչում ենք ոսկե դար: Ուրեմն, մեր ժողովուրդը ոչ միայն առաջին քրիստոնյա պետությունը ստեղծեց, այլ նաև Քրիստոսի լույսով՝ ինքնությունը ազգային մշակույթի արժեքներ:

Հելլենները իրենց Ոսկե դարը, փառավոր Ոսկե դարը, ստեղծել էին Քրիստոսից հինգ հարյուր տարի առաջ, որ ոչինչ ունի անշուշտ քրիստոնեական, բայց մեր ժողովուրդը քրիստոնեությունը ընդունելով, իր ոսկե դարը ստեղծեց: Եվ վերջապես՝ Էլի Քրիստոսի լույսով ու անմահության հավատքով հայ ժողովուրդը առաջին մարտը մղեց ընդդեմ հեթանոսության, վասն Հիսուսի և վասն հայրենի ազատության, Վարդանանց պատերազմին, 451 թվականին:

Ահավասիկ, սիրելի հավատացյալ ժողովուրդ, ինչպես Քրիստոսի լույսով, այդ լույսի փառքով, ինչպես շարականագիրն է ասում, հայ ժողովուրդը քրիստոնյա պետություն ստեղծեց, մի նոր քրիստոնեական մշակույթ հորինեց և վերջապես քրիստոնեական հավատքի համար առաջին մարտը մղեց:

Այսօր էլ թեև անցել են 1690 տարիներ, այսօր էլ մեր ժողովրդի համեր քրիստոնյա լինելը փառքի տիտղոս է: Մենք ճակատաբաց կարող ենք պարծենալ աշխարհի առաջ, քրիստոնյա աշխարհի առաջ, մեր բույր Եկեղեցիների առաջ: Այս ժառանգությամբ է, որ մենք ներկայանում ենք նաև

այսօր աշխարհի առջև: Այս ժառանգությամբ է, որ մենք այսօր բարեկամական սիրո հարաբերություններ ենք մշակում բույր Եկեղեցիների հետ: Այս ժառանգությամբ է, որ մասնակցում ենք, այսպես կոչված, միջազգային եկեղեցական կյանքին, այս ժառանգությամբ է, որ մասնակցում ենք Եկեղեցիների Համաշխարհային Խորհրդի, Եվրոպայի Եկեղեցիների Կոնֆերանսի գործնական: Երջանիկ զուգադիպությամբ նրանց ներկայացուցիչները գտնվում են այսօր մեր մեջ և աղոթում մեզ հետ, շուրջ 14 անձնավորություններ, որոնք ներկայացնում են Եվրոպայի տարբեր երկրների քրիստոնյա կազմակերպություններ ու Եկեղեցիներ: Այս առիթով ձեր բոլորի անունով, սիրելի հավատացյալներ, ես ողջունում եմ նրանց ներկայությունն այստեղ: Նրանք եկած են ծանոթանալու մեր Մայր Աթոռ Ս. Էջմիածնին, ծանոթանալու մեր եկեղեցական կյանքին, Հայաստանում այսօրվա դժվարին պայմաններում: Եկած են մեր վիշտը բաժանելու Ղեռնային Ղարաբաղի ողբերգական իրադարձությունների կապակցությամբ, եկել են այստեղ եղբայրական օգնության ձեռք երկարելու մեր Եկեղեցուն և մեր կարիքավոր ժողովրդին: Մենք այս առիթով պարտք ենք համարում մեր շնորհակալությունը հայտնել նրանց և աղոթել և մաղթել, որ Աստված հետզհետե զորացնի և ծաղկեցնի Եկեղեցիների Համաշխարհային Խորհրդի այս միջազգային քրիստոնեական հաստատությունը, որին մասնակցում են աշխարհի բոլոր քրիստոնյա Եկեղեցիները: Այդ կազմակերպությունը կարող ենք նմանեցնել Միացյալ Ազգերի Կազմակերպության հետ: ՄԱԿ-ի կենտրոնը Նյու Յորքում է, ինչպես գիտեք, և որը ներկայացնում է մի կազմակերպություն, որին անդամակցում են աշխարհի բոլոր պետությունները, քաղաքական մակարդակի վրա: Իսկ կրոնական մակարդակի վրա, Ժնևի Եկեղեցիների Համաշխարհային Խորհուրդն է հանդիսանում, որպես միջազգային կազմակերպություն:

Սիրելի հավատացյալներ, մեր ողջույնի այս խոսքից հետո, ուղղյալ մեր հյուր եղբայրներին, արտասահմանից ժամանած, աղոթենք, որ Տերը իր իսկ հիմնած Մայր Աթոռը անասան, անշարժ և միշտ հաղթական պահի, ի փառս մեր քրիստոնեական հավատքին, ի փառս մեր բարեպաշտ ժողովրդին և ի փառս մեր վերածնված անկախ Հայաստանին:

«Ողջ լերուք զօրացեալ Ս. Հոգւով և յաւետ օրհնեալ ի Տեառնէ և ի մէնջ».
ամեն:

